


VISIMA VIWILI CHILD AND YOUTH FOUNDATION

Mob 0719194900

email: ecsptz@gmail.com

Reg NO 00NGO/R/3645



S.L.P 83,
MLANDIZI,
KIBAHA DC.

16 / 06 / 2023

WANAJAMII WOTE,
TANZANIA.

YAH: UMUHIMU WA SIKU YA MTOTO WA AFRIKA



Kichwa cha habari cha husika.

Siku hii ya tarehe **16/06/2023** ni Muhimu kwa watoto wetu kuelimishwa na kukumbushwa kwamba wanaweza kuleta mabadiliko katika jamii hata wakiwa na umri mdogo. Siku hii huadhimishwa kwa maslahi mapana ya watoto wa afrika sambamba nasisi watu wazima katika nafasi zetu tukitakiwa kujitolea kwa hali na mali ili kushughulikia changamoto zote zinazowakabili watoto katika mazingira yote ya maisha yao.

Katika kuzingatia umuhimu wa siku hiyo, taasisi ya VVCYF inatumia fursa hii kutoa mchango wake mfupi wa kimawazo wa jinsi ilivyo muhimu kuboresha vipaumbele vya mtoto wa afrika kabla ya kufikia hatua ya kuwa mtu mzima mwenye majukumu makubwa ya kijamii kuanzia ngazi ya kaya mpata kitaifa na kimataifa.

Ni muhimu kutambua kuwa binadamu huanza hujengwa akiwa bado katika umri mdogo. Kujengwa kitabia, kimwili (afya), kiakili n.k. Kama inavyosema nukuu kutoka kwa mfalme mmoja kwa jina la Sulemani, "*Mlee mtoto katika njia impasayo, naye hataiacha, hata atakapokuwa mzee.*" (Mithali 22:6).

Ikumbukwe kuwa watu wazima (vijana/wazazi) huishi maisha ambayo kwa asilimia kubwa ni matokeo ya *maisha, mafundisho* na *malezi* waliyopata utotoni. Hivyo msingi wa maisha ya mzazi na mlezi wa leo katika jamii kwa kiasi kikubwa ulijengwa jana na juzi akiwa mtoto mdogo ili kesho inayosubiriwa akawe mzee aliyekwishaweka kumbukumbu fulani nzuri katika jamii. Ndiyo maana inasemwa kuwa "*mkunje samaki angali mbichi*"



Ili kufanikisha hilo ni muhimu haki zote za msingi za mtoto zisipuuzwe wala kusahaulika kwa sababu watoto ni sehemu muhimu ya jamii na ndiyo tegemeo la uendeleu wa taifa lolote. Hivyo basi watoto wanahitaji kulelewa vizuri kwa kuzingatia haki zao kama vile haki ya kuishi, kuendelezwa, kulindwa, kushirikishwa na kutobaguliwa kwa misingi yoyote.

Uzoefu katika jamii na takwimu zinaonyesha kuwa watoto wamekuwa wakipitia maisha magumu ikiwemo vitendo vya unyanyasaji wa kijinsia, utelekezaji, vipigo, utumikishaji wa kazi ngumu, mimba na ndoa za utotoni. Vitendo hivi vimekuwa vikichangia kwa kiasi kikubwa ukiukwaji wa haki za mtoto na hivyo kurudisha nyuma jitihada za kumuandaa mtoto kuwa raia mwema atakayekuja kuchangia ukuaji wa maendeleo katika taifa.

Taasisi ya VVCYF inatumia siku hii ya mtoto wa afrika kuwakumbusha viongozi, wananchi, wazazi/walezi na vyombo vya habari kuwa maendeleo ya taifa letu hayawezi kufikia malengo bila kutilia maanani mahitaji ya watoto hasa watoto masikini na waliokatika mazingira magumu.

Ni muhimu kutambua kwamba gharama ya kutowajali watoto hawa ni kubwa kwa jamii na taifa kwa ujumla hapo baadae. Kushindwa kuwekeza katika huduma muhimu na ulinzi wa watoto sio tu kunawanyima watoto hao haki zao lakini kuna gharama Zaidi baadae itakayotokana na maisha tegemezi watakayoishi na jamii kuzalisha idadi kubwa ya watu wasiozalisha.

Taasisi ya VVCYF inatambua jitihada kubwa zinazoendelea kufanywa na mashirika binafsi ya kutetea haki za watoto, madawati ya jinsia na watoto, wanajamii wazalendo kwa ujumla na serikali katika kupambana na kudhibiti vitendo haramu vinavyodhohofisha makuzi chanya ya watoto wa afrika.

Taasisi hii itaendelea kuonyesha ushirikiano katika jamii kwa mujibu wa malengo yake ya kikatiba katika kuhakikisha usalama, ulinzi na ustawi wa jamii kwa watoto. Taasisi itasonga mbele katika kutilia mkazo urithi wa tamaduni zetu za kiafrika ambazo ndio msingi wa maandalizi ya taifa la kesho lenye raia wema, waadilifu, wachapakazi na wazalendo kwa nchi yao. Aidha taasisi inahimiza kuendelea kuboreshwa kwa mifumo ya sera na sheria mbalimbali zinazohusika na maendeleo na maslahi mapana ya mtoto wa afrika.

MWENYEKITI

